

կասկածեալ էք այժմ՝ ՚ի բանից Յուճաց, գրեցէք ՚ի Դուռն որպէս վայելէ մեծութեան ձերում, ես ոչ կարեմ գրել թէ Պատրիարքն Յուճաց չէ գրեալ, եւ թէ ՚ի դատին այնպիսի բանք չեն լեալ » :

Յետ այսր ամենայնի կոչեաց նաև Դատաւորն զՀայս, և եցոյց նոցա զգիր Կուսակալին, եւ պատուէր առ ինքն բաւական լինել և դադարիլ, զգործ Մննդեան և Աստուածածնի ՚ի ժողովի վճարել, գրել Իլամ և առաքել առ ինքն և ծանուցանել Տէրութեան, թէ այսպէս պարտ էր լինիլ, եւ յաւել ասել Դատաւորն . Հայք ընդդէմ իրաւանց Տէրութեան՝ և հրամանաց նորին խօսիլ և գործել համարձակին : Նոքա ասեն . հպատակ եմք Տէրութեան և հնազանդ հրամանի նորա, երկնչիմք ինքնագլուխ գործել ինչ, որպէս գիտէք այնպէս գրեցէք, սակայն և թէ ըստ հրամանի Կուսակալին առնէք վճիռ ինչ ՚ի ժողովի, չտամք երբէք պատասխանի ընդդէմ հրամանի Արքային, այլ գրեմք առ աղքն մեր ՚ի Կոստանդինուպօլիս և ծանուցանեմք Թագաւորին, և զոր ինչ հրամայեսցէ նա՝ այնպէս առնեմք : Առ այս Դատաւորն ոչ կարաց խօսիլ և ոչ ժողով գումարել, և Մովսէլլայն հրաժարեցաւ երթալ ՚ի ժողով Դատարանի . սակայն չեղև յայտնի թէ զի՞նչ գրեաց Դատաւորն Կուսակալին, և յորգորէր զՀայս տալ Իլամ վասն բաժանորդութեան հլուսխային դրան Բեթղեսէմի, և Ս . Աստուածածնի ըստ հրովարտակին Սէլիմայ . զի գիտեմ ասէր, Յոյնք օգնութեամբ Բղեշխին առնուն յինէն Իլամ և հանրագիր ՚ի քաղաքացեաց չունել իրաւունս Հայոց . զի ամենեքեան վկայեն թէ գուցէ տեսեալ եւ կամ լուեալ իցէ մեր՝ Հայոց տիրել Մննդեան տեղոյն . նախ քան զգրել Բղեշխին ինձ զայսմանէ, տաց ձեզ Իլամ, և յետ այնորիկ չէ հնար ումեք այլայլել զայն : Ասեն ցնա Հայք . դու զմեզ կարեւէր խոցեալ վիրաւորեցեր զսիրտս մեր, և արկէր զմեզ ՚ի վտանգս յայս, և այժմ կամիս զվերս մեր պատել . սակայն բարւոք ՚ի միտ առեալ ծանեաք, որ այսուհետեւ չլինի երբէք օգնութիւն ՚ի քէն, զի դու իսկ ըզհրաման Արքայի արհամարհեցեր, զորպիսի Իլամս տալ խոտանաս, մնացէ առ այժմ այդ : Զի ծանեան զխարգախ միտս նորա, որով զխոտացեալն Հայոց, կամէր ան-